

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 427166 22 St
Tuzla, 26.08.2022 godine

Općinski sud u Tuzli, stečajni sudija Faruk Arnaut, odlučujući o prijedlogu za otvaranje stečajnog postupka nad imovinom društva „**MULTAN**“ d.o.o. za trgovinu i usluge **Sapna , Sapna bb**, dana 26.08.2022. godine donio je slijedeće,

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva **MULTAN**“ d.o.o. za trgovinu i usluge **Sapna , Sapna bb**.

Za privremenog stečajnog upravnika imenuje se Emir Nuhanović iz Tuzle.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- **obezbijediti imovinu dužnika i starati se o istoj,**
- **ima ovlašćenja da uđe u poslovne prostorije dužnik i provede neophodne radnje,**
- **utvrditi da li postoji razlog za otvaranje stečajnog postupka,**
- **ispitati da li će imovina stečajnog dužnika pokriti troškove stečajnog postupka,**
- **utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i**
- **uraditi kontrolu poslovanja stečajnog dužnika.**
- **kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.**

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za

otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Kalesiji i Službi za geodetske i imovinsko-pravne poslove Općine Kalesija, radi upisa zabilježbe otvaranja prethodnog postupka.

O b r a z l o ž e n j e

Predlagač „MULTAN“ d.o.o. za trgovinu i usluge Sapna , Sapna bb kao dužnik, putem punomoćnika Envera Paščanovića advokata iz Kalesije podnio je dana 29.06.2022. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju i da je isti dopušten, dana 26.07.2022. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač „MULTAN“ d.o.o. za trgovinu i usluge Sapna je dana 09.08.2022. godine dostavio sudu dokaz o uplati predujmljenih sredstava za finansiranje prethodnog postupka u iznosu od 3.000,00 KM.

Na osnovu priložene dokumentacije i to: Odluka o prestanku rada društva broj: 01-05/22 od 14.06.2022. godine, Odluka o pokretanju stečajnog postupka broj: 01-03/22 od 13.06.2022. godine, Potvrda NLB banke d.d. Sarajevo, kojim se utvrđuje da je račun banke blokiran od 14.06.2022. godine, Bilans stanja na dan 31.12.2021. godine, predat kod FIA 26.02.2022. godine, Bilans uspjeha za period 01.01. do 31.12.2021. godine predat kod FIA 26.02.2022. godine, Dostava podataka Općinskog suda u Tuzli broj 032-0-RegZ-21-001691 od 31.05.2022. godine, Uvjerenje PU KPU Tuzla – PI Sapna broj 13-3/12-12-5-3055/22 od 12.07.2022. godine, Uvjerenje UIO RC Tuzla broj 02/6/IV-16-11-39-6058-1 od 18.07.2022. godine, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 26.07.2022. godine, zastupnik-direktor predlagača Fadil Mahmutović izjavio je da u cijelosti ostaje kod prijedloga za otvaranje stečajnog postupka nad imovinom društva „MULTAN“ d.o.o. za trgovinu i usluge Sapna, navodeći iz razloga što ne postoje dalji ekonomski uvjeti za rad

društva zbog nesolventnosti. U pogledu prezaduženosti društva zakonski zastupnik navodi da je u spis dostavio Uvjerenje PU KPU Tuzla na ime plaćanja poreznih obaveza u iznosu od 370,58 KM, a prema izjavi zastupnika društvo ima i obaveze na ime neplaćenih javnih prihoda u iznosu od cca 20.000,00 KM. Od ostalih obaveza ističe zaduženje iz osnova ugovora o kreditu kao jemca, koje smatra zastarjelim, te ističe da se radilo o iznosima zaduženja od po 5.000,00 KM. Kako je naveo, račun društva je u blokadi. Koliko mu je poznato društvo nema obaveza prema dobavljačima, prema drugim pravnim i fizičkim licima. U pogledu imovine društvo nema pokretnu ili nepokretnu imovinu te da nema potraživanja prema drugim pravnim ili fizičkim licima, kako to ističe zastupnik društva.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Sl. novine F BiH“, br.53/2021.).

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA
Faruk Arnaut

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od petog dana od dana objavljivanja u „Sl. Novinama FBiH“ . Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.